

七十二家集

陸清河集卷之七

晉吳郡陸雲士龍著

明閩漳張燮紹和纂

頌

登遐頌

夫死生存亡二理之已然者也而世有神仙登遐之言千歲不死之壽其諱固難得而精矣列仙之道作者旣集而登遐未有焉莊周有言我試妄言之子試妄聽之彼之有無蓋難以理求

我之妄聽顧可以言寄之遂爲頌云爾

郊間人

王守倫

去官

孔曾尼

九於仙

大勢出主女

李少君

梅輜

張招

左元放

劉眼

黃伯嚴

費長房

何女子

焦生

鮮卑務塵

韓衆

夷門子

休陽子

任作子

鬼谷子

淵哉郊間懷寶採薪媚茲伯陽常道是資俯翼

遊周攜手入秦遺物執一妙世願神思我玄流

浩若無津王喬淵嘿遂志潛輝遺形靈嶽顧景

亡歸變彼有傳與爾翻飛承雲儵忽飄颻紫微

玄洛妙識飢餒神頽在陰儵逝卽陽無景逍遙
北嶽凌霄引領揮霧昊天合神自靖孔丘大聖
配天弘道風扇玄流思探神寶明發懷周興言
謨老靈魄有行言觀蒼昊清歌先試丹書有造
茫茫九疑登暉太素有漢登聞神具爾顧發彼
靈丘聿來載步貽我則歌永揚遐祚大勝之娥
厥猶翼翼降宮有和納符帝側揮杖指辰絕音
頽息茗茗玄右在彼峻極少君善祠怡爾豐顏
俯覲劉漢仰接爰桓式宴安期巨棗爲餐神光

攸往後來其嘆在漢之衰頽火炎精悔公指景
有皇遺形迹彼文辭胥此洞庭神輝絕景豈外
北冥張招澄精妙思玄芒則是神物錯綜徽章
乃幽乃顯若存若亡因形則變倏忽無方生在
清純放情玄脉在物淵沉泝虛攸遂清酒一壺
百朋具醉有命集止乘龍來萃載見君子言觀
其蔚劉根登芳遺世盤桓形委服容口厭瓊蘭
挹彼呼翕爲爾朝餐景絕巖穴光茂雲端伯嚴
志道翻飛自南北食中歡線形蒿岑奔星凌顏

朱光垂陰雲精九變握輝盈襟長房有懷承師
問道蒙險洪海晞心玄浩將登蓬萊祚爾難老
嘉命旣錫如何勿考逝矣何女芳靈旣彫安寢
曾丘逝魂清霄喪魄載營大墓崇朝玉趾再步
於焉逍遙焦生卜居在河之東皓襟解帶嘉卉
結容順神太素淑思玄冲在彼黃堂明道固窮
北狄務塵在彼沙漠含神自順靜居有恪自彼
王庭聿來伊洛天子命之載見紫閣衛矣終化
靈毛揚葩慎爾貞心神祉來荷靡靡夷門體道

含真食茹靈卉凌雲順神林陽餌車明視聰耳
壯子既食步晞千里任化翫入輕雲揮止移形
霄變載坐載起悠悠鬼谷永言潛止要終有集
資生無始綢繆方平在彼二子芬響蘭揮有來
盈耳

盛德頌

余行經泗水高帝昔爲亭長於此瞻望山川意
有慨然遂奏章以通情焉并爲之頌云爾

晉太子舍人糞土臣雲稽首再拜上書皇帝陛下
下臣雲頓首死罪伏惟陛下紹軒轅之轍哲越
三代之高蹤膺有聖之玄景蘊生民之上略秦
政肆虐漸疊生民在昔上帝乃眷多方肅雍寶
命鑒民顧天思文敝聖以宅神器六合焱駕八
荒星錯金皇居於阿房摘逸鹿於九野謀猷回

適天人匪祚乃爾斯國授漢于西京是以先詔
五緯章太素神母哀號底命丹野九垓闢授命
之符鈞天清建皇之鑒陛下螭蟠泗水龍躍下
亭慶雲徘徊紫塵熠爍皇威肇於斷蛇神武基
於豐沛掩四綬以蓋天廓玄謨以闢宇華宮山
藏玉堂海紉雲蓋景陰金門林蔚拔是崇長揖
之賓吐食納獻規之客玄猷上通德輝下濟仰
翰雲禽俯睢魚魴是以四海之內莫不企景嶽
以接羣望廣川而鱗集乘田涉水視險若夷奔

波闕廷恩効死節乃鳴鸞在衡奔驥服轂良平
鳳棲信布虎據豪雄凌暴於外奇謨補闕乎內
威謀兼陳智勇畢効乃凌河海河海無梁乃什
高出嶽華不重三秦席卷項籍灰分連虜霧散
遺寇雲徹泛時雨以清天灑狂塵以肅地

轡於舟輿竦峻蓋於蒼昊功濟宇宙德被羣
生天人允嘉民神協愛曆數在身有命將集而
陛下猶復允執高讓成功靡有曾天歸德羣后
固請然後謁天皇於圓丘巡萬乘於帝室率土

離暴秦之亂臣妾蒙有道之惠戎余蠻夷之墟
雕趾肅慎之國莫非帝臣巍巍蕩蕩益天臨地
自啓闢以來有皇之矣未有若聖功之著盛者
也臣雲頓首頓首死罪死罪臣以鄙倍文武無
施忝寵奉朝承乏下位而臣逆愍自西徂東行
邁假止路經泗水伏見史臣班固撰錄聖功竊
承陛下扶桑始照天暉未融之日嘗臨御此川
於是卽命舟人弭楫水沚瞻仰山川舊物不替
永惟聖輝罔識所憑遠眺邇念感物興哀終懷

靡及捐心遐慕臣命違千載之運身生四百之
外恨不得役力聖明之鑒寓目風塵之會揮戈
前隊待罪下軍抽鋒咸陽之關提鉞項籍之領
痛心自悼不知所裁行役之臣牽制朝憲雖懷
彷徨王事靡盬肅將言邁實銜罔極臣聞遊魂
變化神道無方雖聖靈登遐降陟在天連光五
精流輝太一或冀神輿降觀薄狩五服時邁王
輅言巡茲邑是以下臣仰瞻紫宮俯要恍惚恩
情振蕩靡審所如不勝延頸紫微結心閭闔之

情謹任水濱拜章陳愚臣雲誠惶誠恐頓首頓
首死罪死罪稽首以聞臣雲言臣聞歌詠所以
宣成功之烈詩頌所以美盛德之容是以聞其
聲則重華之道彌新存其操則文王之容可觀
永惟陛下聖德豐化比隆前代元勲茂功超蹤
在昔故詩歌之所依詠金石之所掄揚者也臣
謹上盛德頌一篇雖不足以仰度天高伏測地
厚貴獻狂夫區區之情臣雲云云晉太子舍人
臣陸雲上

於皇漢祖纂有唐平章在昔文思百王丹輝
棲列火精幽光爰茲聖緒頽維弛綱靈曜熠爍
濟景扶桑則天未墜重規旻蒼其規伊何橫乾
作峻厥德不回矩地能順憑河拓景囊嶽殷韻
龍章綢偉虎質碩變有秦不競罔極黔首震驚
予師思虔神主上帝曰咨天鑒有赫乃眷伊漢
此惟予宅明明聖皇旣受帝祉雲騰下邑風駭
泗水仰鏡天文五緯同晷俯察雲符神毋爰止
思文聖王克廣克遐威凌羣桀德潤諸華爰祀

天人天人攸嘉爰輯蒸徒蒸徒旣和旣和旣順
乃矢德音豐沛之旅其會如林朱旗虹超彤旆
屯尋推師蕭曹撫劍高吟元戎薄伐時罔不龍
凌波川潰肆野陸沉咸陽克殄旣係秦后戕戕
阿房乃清帝宇穆穆聖皇天保攸定有項畔換
不式王命王命旣愆黜我西土於鑠王師遵時
匪怒爰赫乘輿席卷三夏暉暉戎軒矯矯乘馬
變伐強楚至于垓下天誅薄暉暴籍授首區夏
旣混宇宙蒙父肅肅帝居巍巍神器有皇子登

建臨天位繡文于紫組華于黻明明天子有穆
其容至止鏘鏘相繼辟公宜聲路寢發號紫宮
頒此愷悌以畜萬邦思樂皇慶協于時雍琴瑟
在御大予舜功越裳委贄肅慎來王明明聖皇
開國乘制分圭祚勞河山命誓禮律克彰典文
垂藝有漢恢恢䟽罔不替聖功克明九方孔安
良宰內幹武臣外閑漸澤冀域沾被戎蠻連光
太素萬載不刊

祖考頌

雲之世族承黃虞之苗緒裔靈根之遺芳用能
枝植千條穎振萬葉繁衍固於三代饗祀存乎
百世豈非皇慶之積祐神明之殷祥者哉在周
之衰有媯之後將育于姜而貞龜發鳴鳳之兆
周史表觀國之繇故能光宇營丘奄有東海支
庶蕃庶而胤祚昌大矣遭世多難子孫蕩析逐
于南土烈祖丞相邵侯顯考大司馬武侯明德
淑哲沉雄特秀固上天所以繼迹前期惠成顧

者也。是以有吳雲興而仰侯龍見，遂風騰海竭，
電斷荆楚，運籌制勝，底定經略，文德光宣，武功
四克，乃作台衡以御于王政，天綱與先代比隆。
義問與前修接響，固所謂汪洋浩浩，不世出者
哉。武侯以光遠之度，襲重規之範，宣朗之明，照
曾暉之景，故寅亮樞極，則萬物淳曜，糾熙有邦，
而宇內恪居。及至中葉，亂曰：庸臣綏援，旣集而
大難時，弭德濟封域之內，威揚函夏之表，遂仍
世作宰，煜燿祖業，車實襲軌，裘不改帶，元勲曷

於光國洪烈著於隆家考德計功比之前代未
有茂於此者也是以小子敢慕徽猷欽述芳烈
雖不足以當朱紘之一唱發清廟之三歎蓋爾
臣子之遺恩罔極之所處也乃作頌曰

悠悠聖緒上帝是臨世篤其猷于顯徽音神風
往播福祿來尋靈根旣茂萬葉垂林繁盛海堦
頽甯漢陰旣曰甯止芳祐允淑乃步斯淳降神
有陸赫矣二公應期載育明明邵侯允哲允謀
獻心昭德淑問宣猷如日之升如川之至炎精

既頽黃輝曷煥光宅海邦大造江漢王于出征
二公斯難長驅致屈九有有判咸黜凶醜區域
寧晏天祿未終大命有集卜食東夏元龜既襲
聿來故宮作蕃舊邑公徒斯振帝旅凱入於變
時雍神道經始肅肅九命永言徽止公拜稽首
對敷天子猗歟盛歟邵侯有作我考纂戎爰究
爰度遠除尋軌崇基式廓昭明有家祖廟奕奕
中葉虎臣稱亂西秦靈旆電揮伐鼓霆震會朝
哀舉征不浹辰遐風遠掃萬里無塵有族斯祐

念功在茲袞衣之宜遂作上同台光增朗方險
載夷穆矣暉章有吳之旗我祖我考受言藏之
曄曄藻裳再命同服駢駢四牡二世方轂分珪
比璫天秩底祿公堂峻趾華構重屋昔在二伊
于殷有聲在漢之興亦曰韋平惟祖惟考履貞
大亨邈彼披陽追蹤阿衡駿惠雨施景潤雲行
洋洋玄化功濟其民風馳海表光被嶽濱二后
重規世有哲人肅雍碩響萬載是振

張二侯頌

有序

張氏之先蓋少昊氏之苗裔也其在春秋晉德
方休而張老延譽爰暨有漢文成佐命於初基
司空揚聲於末葉流長祚遠世不乏侯輔吳將
軍文侯遭季末雲擾遂避難于東有吳之興實
爲謀主桓王卽世援建太祖知命審於將萌先
識鏡於未兆遂作上將輔成王業立朝無不易
之方正色有犯顏之亮固所謂謇謇王臣古之
遺直者也奮威將軍定侯明德光遠軌量弘濟

文敏足以華國威略足以振衆重規繼體而大
業暉崇故休祚頻繁寵靈仍世天秩之體彌彰
而毀盈之心茲冲用能保寵固世考終碩問蓋
竹帛之所光宣詠歌之所揄揚也乃作頌曰
烈文遠祖肇自上皇金天淳曜遂濟窮桑真人
有作飛龍在天留侯載見階雲自淵卽謀神造
啓運妙玄有漢再命度邑于東其在中葉誕育
司空邈矣唐陵有恭斯甫靈行盈止世篤天祿
神之聽思俾我戡穀繁過芳祐底之洪族洪族

旣昌再惠音徽於穆二侯仍世雙飛堂堂輔吳
抑抑奮威如龍之躍如鳳之輝薄言戾止在彼
紫微金卯紛若四湖畔換文侯乃顧妙世達觀
逝彼塗方度茲江漢鳴飛遵海聿來有亂遭家
不造殲我明聖桓后肇揚侯承末命皇大烝哉
天保未定匪侯卹度宗緒孰正帝整我旅外薄
四荒命作惟師時惟鷹揚遂登上將亮彼大皇
底邑胙土命珪有璋蹇蹇我侯明發宿夜襲彼
遺直興言有暮聿懷來思王室之故猗歟定侯

祗服清曜奕奕瓊範玉潤淑貌淵明往藏朗思
來照曾是徽章再世被荷庸勲開國明道隆家
苾苾其芬淑問揚和有蔚其文如林之華皇矣
帝祚受言旣榮女有行作合諸宮條延延紫極
頽衍皇靈疊疊定侯在盈思冲祗寵戒溢永懷
慎終重光並曜播我芳風

贊

榮啓期贊

榮啓期者周時人也值衰世之季末當王道頽
凌遂隱居窮處遺物求已泝懷玄妙之門求意
希微之域天子不得而臣諸侯不得而友行年
九十被裘鼓琴而歌孔子過之問曰先生何樂
答曰吾樂甚多天生萬物唯人爲貴吾得爲人
矣是一樂也以男爲貴吾又得爲男是二樂也
或皆不免於襁褓而吾行年九十是三樂也夫

貧者士之常也死固命之終也居常待終當何
憂乎孔子聽其音爲之三日悲常被裘帶索行
吟於路曰吾著裘者何求帶索者何索遂放志
一丘臧景榛藪居真思樂之林利涉忘憂之沼
以卒其天年榮華溢世不足以盈其心萬物兼
陳不足以易其樂絕景雲霄之表濯志北溟之
津豈非天真至素體正含和者哉友人有圖其
象者命爲之讚其辭曰

芒芒至道天啓德心自昔逸民遁志山林邈矣

先生如龍之潛夷明收察滅迹在陰傲世求已
遺物自欽景遯瓊輝響和絕音戀彼丘園研道
之微思樂塞泉薄祿眷蕤鳴絃清泛撫節高徽
有聖戾止永言傷悲天造草昧負道實嘉於鑠
先生既體斯和熊羆作祥黃髮皤皤耽此三樂
適彼世華翼翼彼路行吟以遊的的黻冕陋我
輕裘永脫亂世受言一丘媚茲常道聊以忘憂

箴

逸民箴

余昔爲逸民賦大將軍掾何道彥大府之俊才也作及逸民賦盛稱官人以美寵祿之華靡偉名位之大寶斐然其可觀也夫名者實之賓位者物之寄窮高有必顛之吝溢美有大惡之尤可不慎哉故爲逸民箴以戒反正焉

浩浩太素制爲兩儀經始君臣朝有俊弼野有逸民各有攸屈而後品物有倫在昔后帝齊物

達觀賞不假爵教不示勸號謚莫設而生黎淳
晏降迄申古黃象可觀而唐文有煥乃雕乃藻
太樸旣散樸之旣散萬百熙心形爲寵放神爲
利淫有翹者車命彼在林是故懷玉喪寶而被
褐解襟恬亡智生與世或競匪智無鑒匪心伊
鏡芒芒禹迹鞠爲塗徑惟是每懷偏彼反正正
反於寵旣尸干祿相協厥居而豐其屋祿之旣
尸刑爲爾司屋之旣豐喪家于宮故非據之災
戒之在凶人皆知存之爲存而莫知得之爲喪

榮猶振穎墜若頽荒咎自專寵福在循墻是故
保其安者常危而忘其存者不亡無休爾榮身
寔親名無謂爾崇神期好冲戒彼覆餗冒此棟
隆慎微如顯乃保身以終自古在昔逸民有作
相彼宇宙方之委舄夫豈無不休而好是冲漠
是故名利之災至人攸恪謂予未信無寧監于
桑霍天明旣畏神道無親善在求已慶由積仁
無念爾本聿修厥淳執盈如虛乃反天真逸民
司正敢告官人

碑

泰伯碑

夫至仁至德垂風垂化內脩訓範外陶氓俗百
年之教淳道載凝而百年既終邇愛斯軫莫不
肅虔腹廟著名金石遺其後昆聿遵前典是以
禹堂既毀增飾丹青堯碑載焚重覩刊勒泰伯
膺慶二儀協靈七曜志輕天下慈深萬物脫徒
岐周克讓之風斯舉端委揚越衣冠之俗載成
重以仲雍揚波延陵蹈節民習敦厚俗懷忠信

憂深思遠千載遺風笑哉洋洋致足觀也昔滄
洲遁迹箕山辭位志守幽優不越樽俎猶以稱
首高節標名往代豈若吾君之子義結民心獄
訟載歸謳歌屢請能舍玉輿之貴永襲皮冠之
迹悠然獨往信無德而稱焉吳啓金車晉遷紫
蓋寔號帝鄉爰是天邑若乃忠人入國棲愴生
悲殉義希風懦夫立志

陸清河集卷之八

晉吳郡陸雲士龍著

明閩漳張燮紹和纂

誄

吳故丞相陸公誄

惟赤烏八年二月粵乙卯吳故使持節郢州牧
左都護丞相江陵郡侯陸公薨嗚呼哀哉皇朝
迭紹成命昊天聖王作矣世有哲臣觀監在吳
乃降斯神思皇我后應運對揚穎秀若華景逸

扶桑龍輝紫極鳳鳴玉堂舉旗清阻奮鉞夷荒
悠結沉維峻極公綱將撫遠績括地九圍皇淳
奕泰昊旻疾威生民如何哲人其頽登靈在天
遺音播徽敢揚元勲表之素旂乃作詠曰

濟哲我祖時文峻德玄粹納真清休載式本承
慶輝駿惠罔極申錫多祜本支千億芳條遠蔭
靈根茂植根條伊何苗黃裔舜長發有祥貽我
祚晉神明之緒實蕃瓊和音嗣世不替碩彥
明鑒在下降命上玄我公初載天嘏之純重光

納照旋璣授銓仰儀喬嶽俯濯洪川清輝秀穎
雲翹映晨肇彼岐嶷允廻天真先心則智率意
斯仁乘彝清昧體靈協神神休載鑠九德兼和
挹暉茂朴豐淳鎮華景峻凌高玄源踴波造辰
竦隆彌海廓遐光備旣淳逸軌爰超閼網苞荒
景靈渥耀山林嶽秀天光乃照窮化機神探賸
衆妙駭塵氛埃澄響清肖恢淵博量騰嶮峻邵
振綱宇表登軌絕蹈厥初藏器棲蟠海嶽披藻
崑崙濯秀賜谷沉輝熙茂清塵熠鑠含章在淵

發揮龍躍時伏陽九承乾之衰有皇于井玉軒
徘徊爰茲赫奕需期雲飛天步皇興載見太微
華堂誕基委虵自階鼎輝旣膺嘉命乃集和羹
未飪宰物下邑康年屢登惠風時協在斷無頗
于敘斯輯金虎觀精戎車孔肆神器播越天人
釋位有命在茲帝思元帥委弁總干振翼虎噬
威靈旣授六軍有序乃誓我衆乃整我旅神干
山立雄旗電舉懸旌汜陽卽戎江潁我后日敬
上帝臨予靖端夙夜匪寧匪處經始綿綿滂沱

惟海乃幹中軍人作內輔公侯陟降在帝左右
關羽滔天作孽西土帝曰將軍整爾熊虎赫赫
明明皇興出祖龍舟照淵旟旐映野鋪敦江濱
仍執醜虜荆南旣集方嶮未夷天子命我撫之
西垂公侯戾止威神絺熙虔劉作虐思輯子來
妖旂北靡舉爾雄旗曠彼羣蠻祁祁遺黎柔遠
能和薄言綏之方隅肅清烈文雋武舍爵明堂
冊勲天府天子曰咨我圖乃功錫爾青土建侯
于東開國名墟光宅海邦分圭作寶軒輅以庸

旣受帝祐公用加大駟鉞孔阜元戎杳謁淑旂
飛藻綏章承蓋振我輝靈四方于邁劉王負險
寇我西隣公侯赫怒干戈啓陳金鉞鏡日雲旗
絳天凌岡襄嶽沉維括淵元王隕難鯨鯢墜鱗
戎漠時殪方域清塵曹休東踰我疆斯越帝簡
厥佐將命其傑乃俾我公啓行警伐江漢之潯
于天授鉞揖帝整旅隱爾霆發桓桓神誅震驚魏
方我公矯矯虎視元戎截彼醜旅效此武功武
功旣彰天威薄曜靈武震華邊垂清暴振旅飢

入王假有廟假廟伊何本層龕祚土用陪敦四
牡載路出餞于郊此惟予顧禮嘉嵩高樂和湛
露改容肅至傾蓋寵步擊帶翩紛珍裘阿那區
宇惟寧繁邁帝祉於穆疇咨敷奏多士將庸元
輔相維天子僉曰公侯宜有爰止繡裳縟藻袞
帶重紫遂虛上司命公登宰帝曰丞相朕嘉君
德以茲軒冕往踐乃職宣爾獻心維黃協極邦
國若否四方爾式公拜稽首欽翼明聖乃御璣
衡仰徽七政祗恪丕顯無易惟命巍巍天邑惟

清四門公侯作弼煥炳臯文重輝熾景協風煙
燭百神秩祀兆獻思淳克諧庶尹遂成帝勲時
雍旣濟王途克廣儀刑我度軌物垂象後遐施
歸崇賡惠仰茂德棲音廣岡沉響洪範遠迪玄
猷洞深靈澤崇藪天險垂陰翰飛樂嶮淵蟠泳
沉澤豐泉丘潤博雲林遭世大過彝倫靡肅疊
疊公侯思維雅俗發憤戎衣永言禮樂被分敦
化荷戈思學體仁長物御禮熙國叡鑒擢微玄
輝鏡璞戒危膏梁收俊白屋五品時訓民神攸

鑠我有煥文如曜如辰何以崇之匪聞伊人我
有烈武如震如霆何以將之保大豐年思弘景
紫熙世登民克壯碩老秉鉞河津祉祚勿引早
世幽神仰慕遺輝寤辟憂殷嗚呼哀哉永惟我
公克明德心紛藹芳和被之惠林公侯沒矣孰
嗣徽音名存體逝德懋形潛民之秉思好是謳
吟嗚呼哀哉惟帝念功寵命光大考謚典謨崇
榮協泰安宮載考我公于邁輻軒啓塗先驅警
旂哀風結輿遺思馮蓋含此休明卽彼重藹攀

慕靡及永戀光愛嗚呼哀哉

晉故散騎常侍陸府君誄

惟太康五年夏四月丙申晉故散騎常侍吳郡
陸君卒嗚呼哀哉天降純嘏誕育俊乂才雄九
輿德鍾三懿應運繼期顯微闡昧特恢大猷雍
化熙世昊天不弔奄忽零墜嗚呼哀哉朝隕棠
棘邦喪國輝帝欽遺烈士詠清機思經皇心痛
浹民懷揮淚充邑惜慟盈畿敢述洪迹于茲素
旂其辭曰

於穆皇源時惟誕弘權輿有嫺爰帝暨王徽音

接響不祚克昌乾鑿南脊誕降我祖顯考尚書
納言帝宇正命惟允銓衡攸序篤生常侍固天
所隆祚以靈粹陶以惠風道協體稟德與性鍾
膺心遠暢淵思遐通瞻言潛覽克哲克聰耽精
遐奧肆志篇章仰咨遺訓思齊曩蹤摘光啓晦
微言是綱錯綜羣藝精微毫芒顯允閑姿旣明
且偉敦叙汜愛經德紀義契濶邦族是綜是緯
博約以禮陳錫載施雍雍閭閻克諧由仁率禮
崇化色養寧親九族和睦德被宗姻猗猗髦俊

祁祁縉紳鑽仰明範挹道希靡憚悌弘裕惠化
是振潛機密暢靡幽不甄濯以清波權以明鈴
旌善板築用礪紫綢邦無媿幸靈不牟真沐浴
玄源風移俗純儀德鄒甸比化泗濱耀略切輝
旣升朶融爰莅揚邑作尹名邦密邇帝畿大東
小東宣敷五教敞化以崇徵無墜命興無廢功
帝欽良政民懷穆風粵稽舊章率由典刑考績
三載紉幽陟明超踐皇闈紆組垂纓奕世納言
帝衡以平本榮曩烈堂構克榮征輦屢振干戈

未戢乃秉雄戟徵戎東邑四牡徂征威德以立
爰守會稽青紱旣襲帝曰欽哉疇咨羣后改授
顯服屯騎是撫雍容皇甸綜文經武時值大過
士爽其德虔惟常侍高明柔直履冰察霜淪心
遠測春存三季形志于色頻顛厄運載離咎慝
靖享恩順曹氏匪華授弁釋紱浩思東嶽遁世
無悶清源是濯馥風彌馨明徽載鑠皇途旣闢
天罔誕張運在九五宸嶮卽康猗歟高懿避風
遠臧帝降大命丘園是揚裸將天邑舒藻舊京

僉曰休哉昭德塞違乃升常伯補闕拾遺振纓
紫極攄光太微奕奕玄冕熠熠貂璫仰耀皇維
俯映明堂與振鳴鸞體佩琮璜居德彌冲雖休
匪康旣跚君宿未跼鼎辰將陟太階弘載育民
皇靈靡顧大命奄臻厲凶彌留儵忽頽湮嗚呼
哀哉黃河難澄梁木易荒聖賢絕景希世齊光
豈曰徒生實維天綱於鑠常侍本德昭仁俯鑒
瑤響仰綴玉振其在克壯自蹇乘屯鳳翳靈條
龍竄祕泉收逋匿耀洪畧陶緼雖躡嘉運託景

風雲瑰光旣耀靈寶未剛弗慮皇圖銜恨徂遷
嗚呼哀哉江河慕海丘陵樂山於惟君德齊聖
廣淵羣彥景附漸化濯真蓋以崇嚴函以裕淵
西徂華源負澤慕塵幽萌潛暢滯思賴振六言
六行匪君不肅五有三無匪君不極衡准失平
匪君不直方榮遐邇匪君不式君其永沒民其
焉則結思遺愛惟哀允惻嗚呼哀哉仲尼喪曾
孺慕失聲國僑殞鄒邦無竽笙寶惟常侍徽懿
克明恩懷士心信結民情聞者巷泣赴者風征

八音輟響獻酢弗營羽檄霧川輕駕盈庭揮袂
雲蒿殞淚雨零嗚呼哀哉伊惟平生襲寵荷輝
愜樂承明桑梓猶哀聿懷震丘言告言歸明德
遠燭慮凶以吉雖則榮泰存亡是卹爰築新邑
經始匪日眷懷不虞寧覩斯室王事靡盬皇畿
是旋鳴和吉往曾未浹辰震旆凶歸輝景長泯
痛感皇祗哀晉四民嗚呼哀哉穆穆天子昭明
有融乃命王人禮憲是崇賜以歸賻榮以贈終
冠蓋南徂映族輝邦日薄南陸辰次天漢龜策

協貞靈域載判明器旣庇神道已奚縣象未登
明星有爛軒車微動執紼同贊承采高廈黃廬
是館寧彼昏昧荒此輝燦幽房長鍵修夜靡旦
翼翼輕蓋翩翩丹旂龍章舒藻旟旐有輝輔輪
轆結玄駟徘徊人誰弗思靡思匪哀援扎心楚
投翰餘悲嗚呼哀哉

晉故豫章刺史夏府君誄

惟永寧元年五月二十五日晉故豫章內史夏
府君卒嗚呼哀哉乾鑒育俊崇茲大猷景靈垂
祐黃精勸壽濯蹤浩素闡志玄流熙光聖代邁
勲九區哀彼造化殂命不均旣褒斯矣矣茲遐
年祁祁摺紳泣涕流連故作斯誄著之不泯其
辭曰

於穆府君遠祖彌光功濟黎獻澤洽八荒披圖
承禪襲化軒唐洪風旣振遐曜休煌越殷自周

紹膺遺祉亮節三恪侯服千祀悠悠訖茲徽烈
不已奕世本弘厥美是紀惟神降慶篤生府君
玄祐秀朗暉景烟熅誕載豐矣俊穎夙繁性與
體和孝友穆融虔茲君親姻族睦榮情廣褒誘
品物虛躬安仁履素接舊以冲澄鑒博映哲思
惟文淪心衆妙洞志靈源探幽判疑沉欲焱分
躑滯羣祕義猶一貫崇規邈世體道而盤瞻言
先機蔚藻騰翰處約由厚交順于顏文武未墜
君惟克修百行殊揆君望斯周棲義初九戢翼

洪條瓊輝四灼景開綢繆在昔我國元首載哲
假寐俟旦思庸俊逸旃榆高麾體亦秩秩儀刑
柳惠庶績惟穆旣穆其績英風彌邵天子有命
曾是在朝頗繁幃幘祗承皇曜神以測幽明以
達照日難識夷觀嶮收蹈響彼清鑒莫塵其操
五紀迭御載隆載傾南嶽頽鎮蔭輝素靈瑾瑜
遷寶投跡上京兆萌未緝皇聖攸嗟韋臨猗氏
接被郇瑕道之以禮育之以和齊俗拯弊民靡
不嘉振我翰音泮鑠諸華明明皇儲獻哲時招

奮厥河濟矯足雲霄俄軒玄闕徽英揚颺光灼
東朝髦士攸希媚茲一人亦旣翰飛委蛇華閣
陟降太微納言贊事淵裕徘徊習習和風惟穆
惟宣亦曰武昌厥俗允新戎后有命爰授俊臣
君子云顧義在安親秉文共武言撫舊京仰肅
慈顏俯熙典刑移彼滯汙汙宮時營衆否斯濟
飛鵠華聲春翹睇景振鷟在庭高墉未奮遭茲
閔凶頻顙泣血三載以終哀響未歇臺命朝隆
厥命伊何俾守南裔匪曰是也託身虛槩巾車

既膺駕言將逝彝倫惟清路通其序君之于遠
乃恢斯緒思彼衆逸言尋厥楚暮瞻豐林晨看
淵水濯春以翹披途導輶彼湘之東地嶮俗危
明德密罰替幽崇餼嚴不式刑仁扶物施威和
咸振澤被遐畿皇道御世與民靡偏敷彼惠政
濟此未均思一黔首濯漑義淵揖望皇命修翮
翱翔循彼江濱乃眷豫章觀風樹政德音允張
洪化既攄禮樂克昌閑非秋厲惠淑春陽廣命
俊又惟弓與旂丘園靡滯鸞驥憑軒豈方伊類

提髮躬勤震我聲教邁嚮惟殷君化大揚自北
而南君澤本沃河漢載咸慶輝雲騰渥潤川漸
將配星宿登景具瞻昊天不弔乃降茲厲高祿
未融凶焱申燧寢疾彌留大命隕墜邦家不紀
沉哀結世嗚呼哀哉式玩遺美君實克明懷光
暢幽晞髮結清體德秉真審行居貞屈曳蹈機
與世靡矜天命匪謫唯仁則延任道委分亮曰
斯然孰云府君不聞其言永懷載念憂心孔艱
曰兄曰弟篤愛纏綿晞光繼軌參融鴻振今君

何之背世遐湮同生相膺號哀瘁身耿耿孤微
過庭曷遘天何忍斯于何之臻自君初邁旣夷
且榮今君反矣素旂垂銘雖光百辟託咎玄靈
民慟于顯神孤于冥物從人感轅馬失征飄風
悼辮潛魚仰驚豐霄臧蔭衆羽徊鳴嗚呼哀哉
瞻彼日月歲聿云夕寒暑窮化四辰交錯日考
三從案轡長薄藹矣轡軒脫駕窀穸背榮孤世
寧神大漠丘陵竦廕閤闕寥寥寤標惟哀心摧
涕散嗚呼哀哉咨予與君恩親之微蒙恤于昔

投纓瀾猗思周弱志永庇惠輝如何府君昭景
長違顧言永谷載傷載悲昔我經年逝彼川路
進闕趨奔退違陵墓仰瞻靈丘俯增永慕惻剝
肝懷哀其曷厝嗚呼哀哉

文

嘲褚常侍文

六年正月以臨川府丞褚為常侍君子謂吳於
是乎能官人官人國之所廢興也古之興王唯
賢是與呂望漁釣而周王枉駕甯戚叩角而齊
王忘寢委斯徒而縻好爵釋短褐而服龍章姬
妾之族非無人也親昵之愛非無懷也取彼庸
賤之徒登之佐臣之列故九賢翼世而有命既
集五子佐時匡霸以濟夫唯能官人之所以由也

褚氏大夫之常佐遠邦之賤司才則邵矣官實陋矣而拔出羣萃超昇階閣雖文王發師桓公取佐亦何以加之詩曰濟濟多士文王以寧言官人得才也褚常侍聞之喜曰君子之言豈虛也哉吾得此足矣君子謂褚常侍於是乎不謙謙也者致敬以存其位者也謙之不存德無柄矣世之治也君子自以爲不足故樽節以求役于禮敬讓以求安于仁世之亂也在位者自以爲有餘故爵豐而求更厚位隆而欲復廣世之

治亂恒由此作今褚侯蟬蛻楠木鵲鳴玉堂不
庶幾夙夜允集衆譽而意充於一善心盈於自
足足則無求盈則無戒不求則善遠之無戒則
惡來之亦何以爲君子哉詩云戰戰兢兢如臨
深淵慎之至也褚常侍聞是言也懼謂之昌言
也而拜之君子曰褚侯其幾矣聞善而喜過又
應之懼嘉服義之賢而拜讜言之辱規同禹迹
義均罪已君子哉吳無君子斯焉取斯

牛賁季友文

天造草昧萬物化淳類族殊品莫同乎人令子
履方象以矩地戴圓規以儼天該芳靈之欸素
挺協氣於皓玄故神窮來哲思洞無間踴翰則
憤凌風波吐辭則辨解連環子何不絕淵而躍
照日之光使穎秀暘咎景溢扶桑俯經見龍之
輝仰集天人之堂維子之服旣玄而素今子之
滯年時云暮而冕不易物車不改度子何不使
玄貂左弭華蟬右顧令牛朝服青軒夕駕輶輅

望紫微而風行踐蘭塗而安步而崎嶇隴坂息
駕郊牧玉容含楚猿牛在疾何子榮道與德而
遺貴與富之甚哉日月逝矣歲聿其暮嗟乎季
友咸時可惜迫良期於風柔競悲颿於葉落陳
讜言於洪範圖遺形於霄閣使景絕而音流芬
身荐而榮赫奕子如不能建功以及時予請迹
於桃林之薄

附錄

陸雲傳

唐太宗

陸雲字士龍六歲能屬文性清正有才理少與兄機齊名雖文章不及機而持論過之號曰二陸幼時吳尚書廣陵閔鴻見而奇之曰此兒若非龍駒定是鳳雛後舉雲賢良時年十六吳平入洛機初詣張華華問雲何在機曰雲有笑疾未敢自見俄而雲至華爲人多姿制又好帛繩纏鬚雲見而大笑不能自己先是嘗著線經上

船於水中顧見其影因大笑落水人救獲免雲
與荀隱素未相識嘗會華坐華曰今日相遇可
勿爲常談雲因抗手曰雲間陸士龍隱曰目下
荀鳴鶴鳴鶴隱字也雲又曰旣開青雲覩白雉
何不張爾弓挾爾矢隱曰本謂是雲龍駸駸乃
是山鹿野麋獸微弓強是以發遲華撫手大笑
刺史周浚召爲從事謂人曰陸士龍當今之顏
子也俄而公府掾爲太子舍人出補浚儀令縣
居都會之要名爲難理雲到官肅然下不能欺

市無二價人有見殺者至名不立雲錄其妻而
無所問十許日遣出密令人隨後謂曰其去不
出十里常有男子候之與語便縛來旣而果然
問之具服云與此妻通共殺其夫聞妻得出欲
與語憚近縣故遠相要候於是一縣稱其神明
郡守害其能屢譴責之雲乃去官百姓追思之
圖畫形象配食縣社尋拜吳王晏郎中令晏於
西園大營第室雲上書爭之時晏信任部將使
覆察諸官錢帛雲又諫止雲愛才好士多所貢

達移書太常府薦同郡張瞻宜垂纓玉階論道
紫宮嗣入爲尚書郎侍御史太子中舍人中書
侍郎成都王穎表爲清河內史穎將討齊王冏
以雲爲前鋒都督會冏誅轉大將軍右司馬穎
晚節政衰雲屢以正言忤旨孟玖欲用其父爲
邯鄲令左長史盧志等並阿意從之而雲固執
不許曰此縣皆公府掾資豈有黃門父居之邪
玖深忿怨張昌爲亂穎上雲爲使持節大都督
前鋒將軍以討昌會伐長沙王乃止機之敗也

并收雲穎官屬江統蔡克嶺嵩等上疏曰統等
聞人主聖明臣下盡規苟有所懷不敢不獻昨
聞教以陸機後失軍期師徒敗績以法加刑莫
不謂當誠是以肅齊三軍威示遠近所謂一人
受戮天下知誠者也且聞重教以機圖爲反逆
應加族誅未知本末者莫不疑惑夫爵人於朝
與衆共之刑人於市與衆棄之惟刑之恤古人
所慎今明公興舉義兵以除國難四海同心雲
合響應罪人之命懸於漏刻泰平之期不旦則

夕矣機兄弟並蒙拔擢俱受重任不當背罔極之恩而向垂亡之寇去泰山之安而赴累卵之危也直以機計慮淺近不能董攝羣帥致果殺敵進退之間事有疑似故令聖鑒未察其實耳刑誅事大言機有反逆之徵宜令王粹牽秀檢校其事令事驗顯然暴之萬姓然後加雲等之誅未足爲晚今此舉措實爲太重得則足令天下情服失則必使四方心離不可不令審諦不可不令詳慎統等區區非爲陸雲請一身之命

實慮此舉有得失之機敢竭愚懇以備誹謗穎
不納統等重請穎遲迴者三日虛志又曰昔趙
王殺中護軍趙浚赦其子驤驤詣明公而擊趙
卽前事也蔡克入至穎前叩頭流血曰雲爲孟
玖所怨遠近莫不聞今果見殺罪無彰驗將令
羣心疑惑竊爲明公惜之僚屬隨克入者數十
人流涕固請穎惻然有宥雲色孟玖扶穎入催
令殺雲時年四十二有二女無男門生故吏迎
喪葬清河脩墓立碑四時祠祭所著文章三百

四十九篇又撰新書十篇並行於世初雲嘗行
逗宿故人人家夜暗迷路莫知所從忽望草中有
火光於是趣之至一家便寄宿見一年少美風
姿共談老子辭致深遠向曉辭去行十許里至
故人家云此數十里中無人居雲意始悟却尋
昨宿處乃王弼冢雲本無玄學自此談老殊進
雲第耽爲平東祭酒亦有清譽與雲同遇害大
將軍叅軍孫惠與淮南內史朱誕書曰不意三
陸相攜閭閻一旦湮滅道業淪喪痛酷之深荼

毒難言國喪倘望悲豈一人其爲州里所痛悼
如此後東海王越討穎移檄天下亦以機雲兄
弟枉害罪狀穎云

訪二陸故居

宋林景熙

風流懷二陸才名動三吳斯人不可作千載空
煙蕪當時聘俊筆萬象爭先驅有如明月璧美
價傾鴻都世運有翻覆韞匱真良圖惜哉去就
乖毀此千金軀人生皆有死百年同須臾獨遺
文字芳乃與天壤俱淒淒崑山寒冉冉谷水枯
白鶴久已寂黃犬誰復呼荒祠挂殘陽扁舟入
菰蒲采蓴薦秋水庶以明區區

二陸祠迎神歌

元劉子青

肅將配兮靈侯山之戕我兮水悠悠曰皦皦兮
使我心愁伊洛瀕洞兮虎豹塞道崑山之陰兮
有蘋有藻千秋萬歲兮故鄉維好蕙肴兮旣將
椒醕兮斯觴神之來兮泮泮佩陸離兮明月光
晨昭質兮孔章醉而飽兮樂康我無數兮其恒
是享

集評

讀二陸之文未嘗不掩卷而嘆恐其卷盡

抱朴子

士龍朗練以識檢亂故能布采鮮淨敏於短篇

文心
雕龍

降及元康潘陸特秀律異班賈體變曹王縟旨

星稠繁文綺合

沈約

清河之品平原殆如陳思之匹白馬于其哲昆

故稱二陸

詩品

稽君道問二陸優劣抱朴子曰朱淮南嘗言二

陸重規脊矩無多少也一手之中不無鈍利方
之他人若江漢之與潢潦陸子十篇誠爲快書
其辭之富也雖覃思不可損也其理之約也雖
殘筆腐毫不可益也

抱朴子

遺事

周處年少爲鄉里所患後有自改意乃自吳尋
二陸平原不在正見清河县以情告清河曰古
人貴朝聞夕死况君前途尚可人患志之不立
何憂令名不彰邪處遂改勵終爲忠臣

世說新語

陸內史祠在長洲縣益地鄉祀陸雲士龍也雲
因督糧過吳婁見歲侵以所督糧盡賑饑民後
遇難民感其惠以衣冠葬此立祠祀之

姑蘇志